

佛說甚深大迴向經

劉宋失譯師名出祐公錄



南無本師釋迦牟尼佛

說明

本簡體校正版《佛說甚深大迴向經》電子書，根據《乾隆大藏經》第47冊，第0467部，大乘單譯經部《佛說甚深大迴向經》原龍藏雕板印刷影印本校正。句讀僅作參考。特此說明。

仁慧草堂

二〇一七年十月

●起誦儀

香讚

(一編)

爐香乍爇. 法界蒙薰. 諸佛海會悉遙聞. 隨處結祥雲.
誠意方殷. 諸佛現全身.

南無香雲蓋菩薩摩訶薩 (合掌三稱)

南無本師釋迦牟尼佛 (合掌三稱)

開經偈

(一編)

無上甚深微妙法 百千萬劫難遭遇
我今見聞得受持 願解如來真實義

佛說甚深大迴向經

劉宋失譯師名出祐公錄

如是我聞：一時，佛在舍衛國祇樹給孤獨園，與大比丘衆八千人俱。

爾時，世尊與諸大衆前後圍遶，而爲說法，於是會中有一菩薩，號曰明天，即從座起，偏袒右肩，右膝著地，恭敬合掌，前白佛言：“世尊！欲有所問，惟願世尊分別解說。”

爾時，佛告明天菩薩摩訶薩：“善男子，欲有所問，莫得疑難，如來當爲隨問解說。”

明天菩薩即白佛言：“云何菩薩少修善本而獲大果，成多作功德、福報無量？”

佛告明天菩薩摩訶薩：“善哉！善哉！明天，能於佛前問如是義。汝已曾於過去無量諸佛所植衆德本，供養諸佛，親近善知識，能爲樂福衆生發甚深問，諦聽諦聽，善思念之。”

明天菩薩白佛言：“世尊！唯然受教。”

佛告明天：“諸菩薩摩訶薩當於過去、當來、今現在諸佛所，修慈身行，修慈口行，修慈心行，專心念佛所行功德。復次，明天，菩薩摩訶薩當應往詣如來尊廟，禮拜供養，右膝著地，合掌右

遶，散華燒香，懸繒幡蓋，作衆妓樂，尊重恭敬，以微妙音歌，甚深句義，讚佛功德，隨喜歎善。”

佛告明天：“云何菩薩摩訶薩於過去、當來、今現在諸佛所，修慈身行，修慈口行，修慈心行，念佛功德？善男子，菩薩摩訶薩當念如來、堅固士、無上士、最勝士爲師子王，勇猛無畏，自度度彼，自安安彼，自滅滅彼，說真諦法，安立衆生，心無諂飾，淨戒具足，力無畏辯，永除障習，於法自在，無與等者。如是專心念佛功德已，右膝著地，散華燒香，旛繒幢蓋，妓樂供養，是爲菩薩修慈身行。以微妙音，歌甚深句義，讚歎如來無量功德，是爲菩薩修慈口行。因彼身口善根念佛功德，至誠恭敬，是爲菩薩修慈心行。明天，是則菩薩摩訶薩於過去、當來、今現在諸佛所，修慈身、口、意，習行正念。”

佛復告明天：“又，菩薩摩訶薩於過去、當來、今現在諸衆生所，亦應修慈身行，修慈口行，修慈意行，等念衆生。明天，云何菩薩摩訶薩於三世衆生所，應修慈身、口、意行，等念衆生？如是，明天，菩薩摩訶薩不殺衆生、不盜他財、不邪淫、不妄語、不綺語、不兩舌、不惡口、不貪欲、不瞋恚、不邪見。云何菩薩不殺衆生？於

一切衆生慈悲愛念，慚愧愍傷，永捨刀杖。不偷盜者，若於聚落空處所有遺物，不與不取。不邪淫者，若女有主、父母、兄弟、宗親所護，乃至見彼，授華一莖，不起欲想。不妄語者，若於鄉邑，若在王者，堪爲證佐，真誠實語，守死不虛。不兩舌者，常於彼此起和合想，從彼所聞，不向此說；從此所聞，不向彼說。不惡口者，輒語開喻，先意問訊，終不以苦切惡言加於衆生。不綺語者，時說，實說，知義而說，爲利益彼說，心口無差。不貪著，於他財利不起欲想，見來取者心無恠惜。不瞋恚者，於一切衆生除諸恚恨，起慈愍心、饒益心、安彼心，隨順善攝一切衆生。不邪見者，有施，有濟，有說，有父母，有今世後世，有苦樂行果報，世間有阿羅漢，自知身作證：我生已盡，梵行已成，所作已辦，自知不受後有。明天，當知彼不殺、不盜、不邪淫則是菩薩修慈身行；不妄語、兩舌、惡口，不綺語則是菩薩修慈口行；不貪、不恚、不邪見則是菩薩修慈意行。修慈身、口、意，則是菩薩等念衆生。”

佛告明天：“菩薩摩訶薩於過去、當來今現在諸佛所，修慈身行，修慈口行，修慈意行；及於過去、當來、今現在一切衆生所，修慈身行，

修慈口行，修慈意行。所有功德果報，悉與一切衆生共，迴向阿耨多羅三藐三菩提。明天，菩薩作如是迴向者，是爲菩薩少修善本獲大果報，多作功德，福報無量。”

佛告明天：“是菩薩成就無量功德時，持是功德迴向無量智慧，又共一切衆生，盡迴向阿耨多羅三藐三菩提，是功德三種，有三種迴向。何等爲三？謂過去空，當來空，現在空；無有迴向者，亦無迴向法，亦無迴向處。菩薩摩訶薩當作是迴向，作是迴向時，三處皆清淨，以此清淨功德與一切衆生共，迴向阿耨多羅三藐三菩提。作是迴向者，無有凡夫及凡夫法，亦無信行，亦無法行，亦無八人，亦無須陀洹、向須陀洹，亦無斯陀含、向斯陀含，亦無阿那含、向阿那含，亦無阿羅漢、向阿羅漢，亦無辟支佛、向辟支佛，亦無有佛及向佛者。何以故？法性無緣，不生不滅，無所住故。是故，菩薩摩訶薩應以是三種迴向、三種清淨功德，與一切衆生共，迴向阿耨多羅三藐三菩提。是菩薩作是迴向已，又復願言：

‘若我生處，常遇諸佛，逮甚深三昧，見無量佛，成就多聞清淨智慧，弘誓不捨一切衆生。’”

說是法時，百千天人皆願欲往生阿閼佛國。

爾時，佛告尊者阿難：“我向說此甚深法時，百千天人皆願往生阿閼佛國。阿難，當知彼於此終，皆當往生阿閼佛所妙樂國土，從一佛國至一佛國，供養諸佛，聽受正法，得陀羅尼，如說修行，皆當成就不思議慧，於五濁國當得作佛，皆同一號，號甘露音王如來、應供、等正覺，當知彼天受記莵時，百千衆生皆發阿耨多羅三藐三菩提心。”

爾時，釋提桓因白佛言：“世尊！如我解佛所說義，當知此爲大功德趣，爲無量功德，爲無邊功德。”

佛言：“憍尸迦，是法畢竟淨故。”

“世尊！當何名此經，云何奉持之？”

佛告釋提桓因：“憍尸迦，是經名大迴向，亦名甚深法性迴向，當奉持之。”

佛告憍尸迦：“若有善男子、善女人，學是迴向者，當知是人必逮得無所從生法忍，能度未度者，安樂百千無量衆生。”

說是法時，諸比丘衆、釋、梵、天、人、阿脩羅等，聞佛所說，歡喜奉行。

《佛說甚深大迴向經》卷終

● 結誦儀

補闕真言

(三編)

南無喝囉怛那. 哆囉夜耶. 佉囉佉囉. 俱住俱住.
摩囉摩囉. 虎囉. 吽. 賀賀. 蘇怛那. 吽. 潑抹拏. 娑
婆訶.

三皈依

(一編)

自皈依佛，當願眾生，體解大道，發無上心；
自皈依法，當願眾生，深入經藏，智慧如海；自
皈依僧，當願眾生，統理大眾，一切無礙，和南
聖眾。

南無佛 南無法 南無僧 (合掌三稱)

南無一切如來、應、正等覺 (合掌三稱)

南無本師釋迦牟尼佛 (合掌三稱)

南無觀世音菩薩摩訶薩 (合掌三稱)

迴向偈

(一編)

誦經功德殊勝行 無邊勝福皆迴向
 普願沉溺諸有情 速往無量光佛刹
 十方三世一切佛 一切菩薩摩訶薩
 摩訶般若波羅蜜

迴向偈

(一編)

願以此功德 莊嚴佛淨土
 上報四重恩 下濟三途苦
 若有見聞者 悉發菩提心
 盡此一報身 同生極樂國



此咒置經書中可滅誤跨之罪

南无护法韦驮尊天菩萨

